


天外雲花



中華書局印行

序

余既罷講席。益不與人延接。長日閉戶。澆花作畫。用消閒居清況。然海內欲得吾譯稿者。時以書來。言林譯何久不出。得書慙然。計余自辛丑入都。所譯書過百種矣。其自著小說。如劍膽錄。金陵秋。虎牙餘息錄。亦漸次出版。年垂古稀。而又嗜畫。日必作山水半幅。遂無暇及此。昨吾友戴懋齋信來。徵余近作。余適觀趙勇略傳。心念勇略當日戰績爛然。乃爲納蘭所遏。而蔡毓榮彰泰。又不直公。至於抑抑以卒。心頗憐之。遂拾取當時戰局。緯以美人壯士。一以伸趙勇略之冤抑。一以寫陳婉芬之知機。十日成書。檢視頗有首尾。時清史館方徵予爲名譽纂修。余笑曰。畏廬野史耳。不能參正史之局。敬謝卻之。此書

特野史之一。果得暇者。當續續爲之。以貢諸海內識我之君子。甲寅
八月。畏廬識於宣南春覺齋。

劫外曇花

第一章

清康熙十二年十一月二十四日。雲南府之五華山。忽豎大旗。大書曰。天下都招討兵馬大元帥吳闔城大驚曰。吳王行大事矣。顧無一人敢聲言吳王反者。五華山距會城之南。卽明由榔故宮也。繚垣一道。抱山而東折。大樹千章。高者皆百餘年物。正南爲宮門。華表皆塗金。上矗霄漢。馳道白山。跌直上。至關而止。關內石路。光明如鏡。兩旁夾以榆柳之屬。葱翠爽肌。更前爲合殿。鷓尾高翹。千門萬戶。重重皆蔽以朱簾。壁衣。則以蜀錦爲之。朱闌宛委。其上皆覆瓷瓦。周轉曲折。可里許。列院數十。皆美人繡闥。時時聞絃索之聲。王年老。尙能臨御。

而最寵之陳圓圓夫人。已近中年。雖風貌無減。然王新得美人二輩。相見漸稀。陳夫人幾自方爲閩宮之金鳳。無復西湖樂遊之唱矣。王盛富極貴。位極人臣。旣以大兵徧緬甸。縛由榔。及其親屬。由榔先寓書王。情辭哀惋。王弗顧。旣奏捷。遂晉親王。是年四月。以弓絃縊殺桂王。由榔於雲南。時李定國猶在景線。王恐其竊發。由車里入寇。令提督張勇。率萬衆分布普洱沅江之間。未幾定國死。王遂招其散卒。定國子嗣興。詣軍門降。復以兵盪滌定國餘衆。雲南大定。設開化府。永定州。康熙六年。王疏辭總管。洪承疇以巖疆難靖。援明黔國公沐英故例。請移藩久鎮。王遂奉詔留滇。令五丁出一甲。甲二百。設一佐領。積數十佐領。轄以左右都統。設前後左右援勦四鎮。總兵副將。皆自

擇分降兵萬有二千。爲十營。以大將馬寶等十人。爲總兵。凡文武職官。並擅除擢。名曰西選。於是西選官徧天下。復奉勅。雲南督撫均受節制。移提督於大理。遷總督於貴陽。籍沐天波莊田爲藩莊。假濬渠築城爲名。廣徵關市。權稅。鹽井。金礦。銅山之利。厚自封殖。於是定官論列。而楊御史素蘊。有杜漸防微之言。王大怒。再疏辨駁。事遂寢。威振朝列。爲三藩之冠。尋以目疾辭總管事。下部議如各省例。歸督撫管理。總督卞三元。提督張國柱。李本深。交章留吳王三桂。朝廷可其請。以三桂子應熊爲少傅。兼太子太傅。赴滇視疾。三桂益縱恣。當是時。平南王尚可喜。靖南王耿精忠。分鎮東南。稱三藩。天下財賦半爲所耗。會可喜引疾。以子之信代理軍事。願移藩遼東。三桂不得已。亦

請移藩廷臣有言。三桂鎮服百蠻。不宜猝動者。然戶部尙書米思翰。兵部尙書明珠。議如所請。朝廷遂遣侍郎哲爾肯。學士傳達禮。齎詔諭三桂。三桂怒。於是反謀決矣。是日集左都統吳應麟。右都統吳國貴。副都統高得捷。塔夏國相胡國柱。及總兵馬寶。高起隆。劉三復。張足法。王會。王屏藩等。於殿墀。王曰。清以二臣傳諭。是疑我也。我自山海關迎多爾袞之師。進撲李白成。不有吳氏者。多爾袞焉能入關。且吾不憚兵力。進取由榔於緬甸。何者。不足以對愛新覺羅氏。今乃謂余反側。竟令移藩。須知根本一動。新蒞之地。民心不附。脫有奸臣。奮雌黃之口。一紙詔書。死我足矣。若輩從余百戰。得假息於此。余行君亦焉保。高鳥一盡。良弓卽藏。深爲君輩危之。爲今日計。不如舉兵出

湖湘之間。進窺武漢。武昌爲天下上流。進可圖豫。下亦收吳。諸君以爲如何者。馬寶者。梟將也。於三桂部曲最精悍。進曰。卞三元已去。甘文焜息息備我。此不可不誅。宜先以兵取貴陽。執甘文焜。今巡撫朱治國在此。當脅之降。巡撫降。藩臬以下。望風歸順。三桂大悅。卽以使者趣巡撫朱治國至。朱長髯玉立。亢直有節幹。聞使者至。決三桂必不移藩而匆匆間召已。決無佳兆。遂部署後事。冠服升輿。旣履殿門。見衛士已大集。滇中諸大將盛蒞。心知變在眉睫。卽長揖曰。王何爲見召。三桂曰。朝廷疑我。以使者來。是偏我移藩也。朱不待言畢。卽曰。移藩王所陳。請朝旨如王所請。未爲非。是三桂曰。詐也。余昔自漢中入滇。漸次分移。閱三歲始竣。今生齒彌增。試問何往。屯此大軍。朱曰。

然則王以魏博自居耳。三桂不知書，不知魏博爲何人。朱因告以牙兵之事。三桂大怒曰：爾敢以叛目我耶？朱曰：王之叛謀，路人知之。治國書生耳，知食人之食者，忠人之事。王固有淫威，吾不王之畏也。三桂視左右衛士，執白梃，力撲朱。治國於墀下，梃落如雨。朱命立殞。乃下令，下使者哲爾肯，傳達禮於獄中。大集省中諸大吏，提督張國柱、總兵杜輝、柯鐸、布政司崔之英、提學道國昌、成長、跽乞命。三桂並授以職。按察使李興元、知府高顯辰、同知劉崑，相顧無語，且不跽。三桂叱曰：三君如何？李興元曰：死耳。吾不能從逆也。三桂令衛士笞之，體無完膚，昇置獄中。是日顯辰仰藥死。明日下令蓄髮，復明衣冠。致書平南、靖南二藩，及黔、蜀、楚、秦官吏，舊相識，要約黨附。幟尙白，步騎均

以白氈爲帽。馬寶以精卒馳至貴陽。取甘文焜。文焜已前覺。時川湘總督蔡毓榮駐荊州。文焜馳書告之。令爲備。且遣人詣闕告變。自以數騎趣鎮遠。會貴陽提督李本深應三桂。副將江義得檄。以兵圍甘文焜於吉祥寺。文焜忠梗有風操。知降敵死。轉以自隕。其名節。乃具衣冠禮佛。後拔劍自刎。是時貴州巡撫曹申吉。黔西總兵王永清。沅州總兵崔世祿。以次降。三桂進兵陷沅州辰州。燕京聞耗。召王大臣議。曰。吳三桂已反。荊州乃咽喉地也。宜以重兵鎮之。荊州者。東連吳會。西通巴蜀。南極湘潭。北據漢沔。上流之重鎮也。廷議及之。而三桂亦已料及。迨長沙岳州連陷。三桂之勢成矣。此時廷臣議赦黨人。以解散其勢。遂下三桂子應熊。及其從官於詔獄。拜順承郡王勒爾錦。

爲靖寇大將軍。督師趣荊州。遂宣詔中外。謂三桂性類窮奇。中懷狙詐。寵極生驕。竟行反叛。背豢養之恩。逞鴟張之勢。橫行兇逆。塗炭生靈。理法難容。神人共憤。其有能擒斬吳三桂。投獻軍前者。卽以爵之。有能誅縛賊渠。及以兵馬城池歸命自效者。論功定從優敘。十三年正月。三桂遂稱周王元年。大鑄錢文曰利用。時朝命貝勒尙善爲安遠靖寇大將軍。合勒爾錦大軍進討。尙善寓書三桂。謂母蹈公孫述彭寵故事。赤族湛身。爲世大僂。三桂得書不報。

第二章

外史氏曰。凡第一章所言均史中所記者。作者爲之節錄而登之。大類抄襲。不知吾書本敘一壯士及一美人而二人之好合卽在滇中。

此美人尤與吳氏有係屬。苟不將三桂。歷史和盤托出。則吾書轉無從入手矣。方三桂答故朱巡撫於殿墀時。三桂有從孫曰世渭者。正人也。官參將。統左翼一軍。凡千人。世渭年四十二。曾隨三桂破白文選於玉龍關者。先登陷陣。以軍功獎敘得參將。三桂頗引爲心腹。用長槩騎善馬。出入萬軍之中。驍勇無敵。顧不善側媚。三桂左右因是見疎。是日馬寶諸人集議。世渭亦居班列。見朱巡撫聲容慨慷。凜然有顏。杲卿段秀實節概大爲歎惋。旣罷議。怏怏騎馬下五華山。向圓通寺街而行。世渭妻曹氏有女曰楚英。國色也。馬寶之子頗涎而欲得之。世渭素輕馬寶。不之答。楚英年十七。頎然高出於羣豔之中。髮如濃雲。脩眉入鬢。星眸明淨而黑。橫波一顧於溫婉中。卻含端肅而

又。不。流。於。嚴。冷。朱。櫻。之。絳。如。滴。位。置。天。成。有。周。昉。龍。眠。所。不。能。描。畫。者。十。二。歲。已。熟。五。經。迨。長。則。精。專。詩。詞。更。工。畫。詩。近。高。青。邱。詞。則。王。沂。孫。也。閨。中。牙。籤。插。架。世。渭。四。十。以。後。始。舉。一。男。故。心。愛。此。女。幾。類。承。祧。主。鬯。之。胤。嗣。曹。夫。人。則。肫。然。如。佛。爲。宿。儒。曹。澧。西。之。女。通。經。而。能。文。專。授。愛。女。女。之。學。問。初。不。假。諸。外。傳。而。得。也。世。渭。既。歸。侍。者。引。馬。歸。廐。既。入。座。夫。人。方。讀。伊。川。文。集。世。渭。笑。曰。汝。謂。洛。學。如。何。者。夫。人。曰。洛。學。能。鑄。忠。臣。孝。子。世。渭。曰。夫。人。謂。王。忠。乎。語。至。此。楚。英。盈。盈。自。帷。中。出。曰。阿。爺。今。日。言。乃。有。異。世。渭。曰。楚。英。終。聰。明。過。其。母。夫。人。曰。此。語。頗。奇。突。乍。蒼。頭。入。言。朱。巡。撫。杖。斃。此。詎。朝。廷。意。耶。吾。王。固。有。節。制。督。撫。之。權。然。大。臣。有。罪。寧。卽。撲。殺。了。之。世。渭。愴。然。曰。夫。人。不。知。

王已舉大事乎。夫人擲書起曰。反耶。世渭及楚英大窘。力趨戶外。視無竊聽之人。乃曰。夫人何言之。戇王舉大事。吾爲王族孫。卽欲自拔。亦無從得。赤族之禍。行亦及我。我死奚恤。所不忍者。楚英耳。女進曰。王據勢大盛。已成騎虎。且年已垂耄。正防諸孫不能承其門業。故欲化家爲國。然暮氣憤兵。亦斷無自存之理。女一身濺血。亦不之惜。唯二親生平慣持名節。今以王故不能自居。以清流似九幽之中。亦無此陰沈之冤獄。語次滂沱。衣袖盡濕。世渭忽左右顧曰。奈何不見阿龍。夫人曰。適爲圓通寺僧月藻。招赴綠眠庵。談劍術耳。世渭曰。前五年已聞阿龍從月師遊。吾以爲學禪也。乃不圖其舍禪學劍。吾亦微有所聞。究竟如此紛謬。卽成劍術。亦何用者。讀吾書者。度必欲知阿。

龍爲何人。阿龍氏曹名壺。字龍川。阿龍其小字也。爲曹夫人之從子。少孤。依世渭以長。年二十一矣。無書不讀。尤好孫吳兵法。當十七歲時。遊圓通寺。月藻方爲西堂。見而異之。與論佛國故實。生於南宗一派。尤極神悟。月藻年已五十。通劍法。善用飛鏢。蓋其師爲少林適傳。重月藻。盡以授之。月藻有徒子。曰慧靖。靖而不慧。又外驚而好酬應。長官月藻惡之。因就忠愛坊後小庵中。習靜。時招阿龍講劍術。並授以飛鏢之法。百步外。注香於壁。以鏢投之。匪不中者。五年以來。阿龍已盡有其師之技。一日過金馬坊。坊下一老尼。羸困作饑疲狀。阿龍心憫。予以百錢。尼合十稱謝。後忽仰面曰。居士非月師弟子耶。阿龍大驚。問師何由知之。尼曰。緣法所在。不能明白言之。居士且從病衲。

至野外。阿龍心異此尼。決其有異。然既少有施與。或得其酬。彼既知月師。則此尼斷非泯泯者。既過雞鳴橋。又行數里。人煙漸稀。而尼行步趨捷。不類病困。阿龍力趨。僅及其後。已見大樹數章。密葉交陰。如結深洞。地上草厚可逾寸。上有破蒲團一。其旁有小土鏗。似尼作糜者。尼既踞蒲團。令阿龍坐地上。曰。月藻外家之學也。乃不知用內功。以運祖氣。凡能運氣。以使劍。劍光周身如嚴城。卽沃之以水。劍客之身。涓滴莫能入也。於是授以口訣。並出長劍於草間。騰擲飛舞。寒光一團。少頃。以杯水令沃其身。劍過。水皆莫入。生既慧而善識。則盡解其法。長跪稱弟子。問法名。尼笑而不答。遣之。行里許。迴望林間。煙縷騰起。復返而視之。則尼已不見。地草爲火所爇。幸溼而不颺。阿龍

太息而歸。告之月藻。月藻驚曰。是堵師也。何爲在此。阿龍問堵師生。平月藻弗語。且曰。吾不久西歸矣。向與堵師約。彼來路卽我圓寂之期。此間將有兵禍。衲亦不能兵解。當以涅槃爲歸。汝遇天水。則功名立矣。方月師自陳示寂之期。正世渭覓取阿龍之日。阿龍旣歸。尙不審三桂之反。見五華山宮殿已樹白幟。卽入問世渭曰。王何爲易其故幟。詎今上晏駕耶。世渭不語。夫人曰。阿龍童騃哉。汝乃不知王已舉大事矣。阿龍歎曰。早料其如此。然闖獻舉動。特爲愛新覺羅氏前導之清塵。王謂睿邸入關。均王所賜。乃不知人心已嚮。天命不佑漢族。無可爲也。官家以冲年能誅鼇拜王。卽蓋世之雄。終不能抗彼黥布之勇。置陣如項羽。力固能勝漢兵者。胡爲弗勝。知王以南軍抵北。

縱訓練有素。終非北方健兒之敵。且夏國相諸人。初非大將之才。其最桀黠者。惟馬寶及王屏藩耳。然王一日不死。則雲南必有一日之安。顧王春秋高。苟中道不諱。彼世琮諸人。能成大事耶。夫人聞言大驚。曰。汝饒舌。至是。且晚赴東市矣。世渭歎曰。阿龍雖亢直。然言頗當。理天心。人事如響。斯應。因顧楚英曰。吾兒以表兄之言爲何如者。女曰。兄之所言者。天命。兒之所論者。地理。自古英雄起事。以據勢爲上。著雲南僻在蠻荒。出兵必趣湖廣。若不得荆襄及武漢。萬不能窺足中原。今雲貴固可席卷而行。兵須跋涉山水。脫荊州武昌爲重兵所扼。縱合兩川爲聲援。亦決無進取之勢。兄當不以妹言爲妄。阿龍鼓掌稱頌。以爲知兵。

第三章

是日。城中將卒紛馳。大兵盡出。而世渭爲王懿親。尙未遣赴前敵。圓通寺街里第。頗寬綽。前五楹爲客堂。高檜七株。其上參天。堂中爲綠陰所偃。深黑如洞居。後軒明豁。蒔花數百本。環以朱闌。闌西趣入月門。則桂花三數株。中間老梅一株。梅身拗曲爲龍形。一榦壓牆。數枝則臨窗內嚮。花時幽香撲人。中有小樹五楹。積書滿之。則爲世渭燕息之所。更左則小樓出萬竹中。樓窗四敞。直面五華山。阿龍下榻其中。每日必取軒中書。寘之樓上。讀盡更易。樓下有小徑。別通一門。奇石聚爲小山。山峯突出牆上。其巔盤以凌霄花。其下細草如氈。爲球場。一亭如笠。垂楊四環。獨坐亭中。爲柳絲所蔽。但見其尖如笠耳。右

轉一門。則畫閣三楹。傳以丹碧。楚英臥室也。世渭夫婦。別以一門通入其寢。高軒廣闔。氣象宏壯。女每日必至是間朝母。軒前有池。金魚滿之。闌楯咸用赭黃。雜樹林立。幽雋動目。亂事既肇。省中人心皇皇。有言吳王英武。必得天下者。有人云漢族不振。決非光復之時。然王禁令甚嚴。不許民間談及兵事。令治業如故。世渭每日亦必朝王。時小朝廷已立。外復帥府舊儀。髣髴用朝儀矣。王金冠龍袞。置相及六部。朝官均執笏。拜闕下。世渭內媿。歸輒太息。一日早朝。罷見阿龍。面有淚容。則月師已圓。寂矣。世渭頗稱異師之道行。阿龍曰。日來姑丈頗有所聞否。世渭曰。近者福建耿精忠。已效順於王。廣西則孫延齡。馬雄。四川則鄭蛟龍。吳之茂。譚洪。陝西則王輔臣。皆動兵抗清室。獨

廣東尙可喜。未來通款。在理。陝西一動。勢如建瓴。唯張勇一軍。勅敵也。吾恐王輔臣決不能支。王近者通書達賴刺麻。達賴允爲王緩頰於朝。乃不見許。已更遣康親王傑書統大兵來討。朝廷此遭震怒。分遣親王。悉師南來。未易當也。阿龍曰。王以何人抵北軍也。世渭曰。王遣吳應麟。廖進忠。馬寶。張國柱。柯鐸。高起隆等。悉師外出。阿龍曰。羣帥並統一師乎。世渭曰。否。諸將分道。一窺江西。一由大江達南康境。陷都昌。一由長沙入袁州境。陷萍鄉。安福。上高。新昌。阿龍曰。王果能兵。姑夫久在兵間。力雄萬夫。胡以不在調遣之中。世渭曰。孺子殊不更事。方王集議時。余微有難色。馬寶已覺。且王孫世琮將軍。亦不直余。余禍且在旦夕。違言調遣耶。阿龍曰。姑丈之意。測王能成事乎。世

渭。以。面。仰。承。塵。久。之。始。曰。大。凡。舉。大。事。者。必。俟。天。下。有。釁。或。朝。政。不。綱。民。怨。叢。起。乘。人。心。憤。懣。之。際。袒。臂。一。呼。或。可。集。事。秦。不。有。二。世。及。趙。高。之。暴。勝。廣。之。屬。烏。能。揭。竿。旬。日。使。天。下。響。應。今。清。廷。多。爾。袞。及。鼈。拜。咸。蹂。躪。漢。產。然。多。爾。袞。已。前。死。鼈。拜。亦。伏。法。康。熙。帝。方。盛。年。善。於。調。度。諸。將。積。北。庭。精。銳。以。南。嚮。王。春。秋。高。卽。能。力。抗。久。必。不。支。今。諸。王。雖。秉。節。鉞。咸。碌。碌。不。足。慮。有。趙。良。棟。者。其。人。英。傑。也。苟。以。精。銳。南。來。恐。非。吳。應。麟。諸。人。所。能。抗。抵。阿。龍。曰。姑。丈。何。知。之。世。渭。曰。吾。曾。以。事。至。陝。一。面。趙。良。棟。英。果。洞。兵。略。善。於。率。下。王。進。寶。雖。與。志。嚮。不。同。亦。一。時。之。雋。王。輔。臣。固。驍。悍。力。不。能。敵。張。勇。陝。西。一。路。且。晚。燿。矣。阿。龍。曰。聞。廣。西。將。軍。孫。延。齡。已。將。馬。雄。鎮。囚。拘。矣。亦。歸。命。於。王。敢。問。

孫延齡如何。世渭笑曰：「反側小人耳。馬雄鎮漢軍人，忠於清室。延齡素憚其威信，以兵圍其署，然不敢進犯。馬則閉戶塞竇，盡室不出，不死亦不降。孫氏心持兩端，意我軍敗者則釋馬，雄鎮之囚冀結好於清室。若王大事倖成，則將馬、雄鎮來獻此策。王已前知吾恐馬氏未亡，而孫宗已燼矣。」語至此，忽有侍衛騎馬到門，出手諭一封，言陳夫人請女公子入宮。世渭大驚，起發其書，曰：「春盡薔薇猶有餘花，閒居無事，頗念身在江南時。乘春出遊，今閉置無歡，甚願與女公子爲楸枰之戲。幸勿姍姍來遲也。」陳沅斂衽，世渭禮待侍衛，言卽以小女入宮。侍夫人起居，遂呼楚英出，曰：「陳夫人趣爾入宮弈棋。汝見夫人，言語宜慎。」楚英不悅，曰：「兒僅見夫人一面耳，奈何見延。」遂入閣理裝。時

雲南以復明制。女廣袖長裙。而高髻。垂鳳釵一股於靈蛇髻中。珠穗下垂。如玉旒。行時隨風而顫。玉貌微豐。豐不顯肉。明鐙垂耳。鬢黑如漆。不施朱鉛。而光豔奪目。阿龍侍側。如癡如醉。女出時。御白籐之轎。素羅之巾。忽爲風落。阿龍拾而奉之。巾中芬芳勃發。作龍涎香氣。與行阿龍尙目送之。至登山入林陰中。不見始入。

第四章

陳夫人名圓圓。明史作沅字畹芬。母姓陳。圓圓實爲邢氏所生。初至時。府中咸曰邢太太。以邢氏無人。仍從母姓。爲陳夫人。本玉峯歌妓也。王初聞其名。齎千金聘之。然已爲田皇親所得。田皇親名畹。懷宗田妃父也。甲申之春。流賊之燄四煽。帝長日不懌。妃欲以美人媚帝。令釋

宵旰之憂。遂盛飾圓圓進御。帝穆然無言。遣還田氏。時闖賊將偪畿輔。帝召三桂對平台。命以重兵守山海關。時流言麻起。傳闖賊旦晚至京師。田畹憂危不知所爲。圓圓請畹當要結吳將軍爲衛。必延飲。且以家妃娛悅。畹如言。三桂振甲臨筵。酒三行。且起。畹延入繡闥。出圓圓行酒。三桂悅。釋甲易裘裳。顧畹曰。京城旦暮陷。公能長溫柔鄉。而獨無所懼。怯耶。畹慚竦。不能答。圓圓私語三桂曰。楊公尸居餘氣耳。試問紅拂。能甘心付此泉下物耶。三桂頷之。酒半。警報至。畹失驚。三桂曰。能以圓圓見贈者。當保公百口。畹不能拒。三桂麾從者進馬。馱圓圓而去。自成既入京。所部奪陳圓圓。三桂遂背父而迎清兵。自成戮驥。留圓圓。多爾袞既逐自成。三桂遂得圓圓。寵之專房。數十年。

如一日。至是。圓圓已漸老。雖膚色尙瑩潔。而三桂已別有所屬。圓圓獨居無聊。聞楚英美而通書。遂延之入宮。此時楚英簾轎徐至闕下。衛士止問何人。侍者報言陳夫人命召吳參將女公子楚英。入侍。衛士遂敲榜者三。示內廷。已而有侍女二人。自內出。引楚英下車。卽有二宦者。以腰輿請楚英上。舁入宮中。千門萬戶。藻麗不可殫述。夫人所居。非正寢。左方有輦道。甚長。槐柳夾之。有月門。其門盡綴籐蘿。朱闌繡戶。畫簾四垂。有女侍四人。挑簾而起。導女入門。屏風九疊。皆塗金。其上細書似宮詞。轉入金屏之後。已見垂花之門。玲瓏如鬼工。幔作藕合色。溫香一縷。已從中出。室中雅樸不華。斐几上。供古鼎。龕上白瓷。爲南海水月觀音之象。夫人常服無華飾。榻上加蒲團。已盈盈

而下。年雖四十許。而風致猶在。見女。執手不釋。言曰。女公子。邇來尤秀豔。出塵矣。老身久不相見。乃長成如許。令人愛不忍釋。女下拜曰。楚英久慕夫人高素。老父名在軍籍。猥賤不敢進瀆宮禁。乃蒙夫人逾格寵賜顏色。夫人曰。此言宮禁。耶言半。卽止。微動傷感之容。卽命坐。曰。老身近日。勘破塵緣。深入佛海。不如輩已數月矣。女公子來此。恨無盛筵相款。女躬身曰。夫人盛寵。已增貧女輝光矣。胡敢他有所望。夫人曰。王春秋高。近又勞於兵事。老身稀得進見。近已陳請於王。於金馬山之麓。築曇花庵。行且出府。就彼間長齋繡佛。終我殘年。足矣。女不敢答。但唯唯。侍者旣進茗。夫人屏去。勿令侍側。附耳言曰。女公子謂王舉事能濟否。女戰慄言曰。王雄才大略。兵謀深遠。寧小女

所能推測。夫人曰。佳哉。女公子之善自保身也。實相告。老身料之熟矣。決無成功。耿精忠沈酒色之徒。尙可喜。年高而尙之信。酬酒嗜殺。壺樽杯斝。與弓刀矛戟之屬。隨其所至。必兼攜以行。坐則趣飲。醉必殺人。深宮靜室。無解醒。卽引佩刀刺其侍者。寵僕豔姬。咸帶癍痕。復好畜狗。築狗房。設狗監。一日。瘳狗噬人。人噪逐之。之信大怒。則寸轡其人。以餵狗。今雖爲父所制。不敢附王爲亂。然久亦必發。發亦無濟。王輔臣雖極知兵。已爲張勇牽綴。孫延齡蟲豸之雄。反側無常。胡濟大事。今雖天下響應。然不得荆襄武漢。終不能遽成大業。老身本常州奔牛鎮人。少墮平康。老悲衰朽。燕幕之託。胡能久安。今延女公子至此。特一傾吐胸中悲梗之情。使世之清流。知我陳圓圓。固非藉。

惜然。不明。順逆者也。夫人語時。女顏色驚怛。不知所爲。既不敢少作答詞。尤防屬垣有耳。茗後興辭。夫人笑曰。老身且晚去此耳。金馬山非遠。女公子或能見過。女曰。夫人果以使者見招。匪敢後期而至。遂興辭而出。

第五章

女籐輿出宮。時已逾午。阿龍徬徨山下。見輿至。乃大喜。輿及大門。曹夫人已迎候。相告勞。問夫人何言。女四顧不卽答。退入密室。以茗自鎮。然後去裙衫。易常服。下其釵璫。卸高髻。臨鏡久之。曹夫人仍趣問。陳夫人何言。女微語曰。夫人料事如神。因附耳述。陳夫人語。曹夫人且問。且太息。已而侍者言。主人歸矣。母女均出。而世渭方與阿龍語。

甚憤怒。夫人曰。將軍詎自府中歸耶。胡以盛怒。不可遏抑。世渭曰。馬寶已進據湖南。窺擾江西。清廷命安親王岳樂。統大兵南來。然荆岳要隘。仍爲清兵所扼。聞岳樂兵將由袁州直取長沙。斷我餉道。亦以分我兵勢。此在萬難之中。而馬寶書來。仍爲其子議婚。欲娶阿英。並言苟不之許。將以劍客夜至。竊取以去。吾家素無警備。賊果出此者。且奈何。楚英顏色不變。言曰。女以清白之身。萬不污諸賊手。自今日始。用七首白隨。以清白來。卽以清白去。賊卽橫暴。其如我何。阿龍笑曰。妹無須此。兄足以了其人。世渭曰。然月師之技。可今日售矣。遂傳語家下諸僕。令戒備。世渭亦枕戈以待。置其書不報。越三月。晚涼。飯罷。月尙未升。世渭與阿龍同坐闌干之次。談兵法。忽聞簷際微有聲。

響一聲蚩然。直射阿龍。暗中一道白光。其疾如電。阿龍引手接之。則一瑩瑩小七首也。綴以小箋曰。此非索女之時。特死爾第中一人。示警。苟出美人。禍尙可杼。阿龍語世渭曰。能否啓王。與論曲直。世渭曰。王方信用。馬寶萬非。忠言之所能入也。阿龍附耳曰。此後壺當日寢而夜興。防此劍賊。曹壺一日不死者。妹必一日無恙。世渭曰。余今以全家性命託汝矣。余於馬上奮槊殺敵。頗盡一日之長。今偵伺隅陬。與鼠賊搏擊於暗中。余自知不逮也。逾三日。月已漸缺。近下弦矣。阿龍急裝縛袴。飽食後。佩長劍。囊鏢腰際。匣燈於庭角。寂無聲響。二更向盡。缺月已上。有微雲作黑陣。翳月不輝。阿龍隱於柳亭之下。微風一振。雲陣稍開。月光復吐。時夜已午。見西角牆上。有物如伏狸。已而

漸高則人影也。衣服純黑。阿龍植立無動。柳梢忽低。則其人已從柳上翩然至地。阿龍出鏢擲之。鏢至賊已覺。鏢鋒從耳際而過。賊四顧不知鏢之所從來。頗躊躇以手向額。翳月光四覓。阿龍乃不更出鏢。拔劍蛇行而前。賊微聞聲響。卽迴面覷柳陰。知有伏甲。亦植立無動。阿龍疾步前撲。劍下賊斂避。如風阿龍勁捷。運靈腕轉其劍鋒斜趣敵頸。劍略高僅斷其幘。幘亦黑色。隨劍風飛越數尺以外。賊狙伏以刀橫截阿龍之腰。阿龍騰起乘勢以劍尖疾刺其眼。賊首左側劍過其肩。上不中賊卽橫其左腕。以刀左嚮阿龍之脅。刀尖甫及阿龍已騰越數尺許。伏身猱進。劍近賊眉。賊忽仰臥。阿龍劍下時賊疾轉其軀。騰越以刀斫阿龍之背。阿龍眼捷已轉其劍鋒上嚮迎之。二刃相

觸。厥。聲。鏘。然。火。星。四。爆。卽。聞。有。人。大。聲。呼。賊。世。渭。已。從。門。中。挺。長。槩。奔。出。槩。鋒。直。向。賊。之。咽。際。賊。知。援。至。力。奔。近。牆。西。世。渭。槩。及。賊。背。賊。卽。騰。上。槩。桿。如。驚。蝶。過。牆。去。矣。阿。龍。頓。足。曰。姑。丈。乃。多。此。出。更。數。合。者。吾。乘。間。中。之。以。鏢。賊。必。可。得。然。必。更。來。當。嚴。備。之。今。夕。且。不。歸。寢。世。渭。拉。槩。言。曰。吾。在。萬。軍。中。仗。此。槩。無。能。當。我。者。不。圖。今。夕。乃。爲。鼠。賊。所。窘。也。此。時。漏。以。四。下。世。渭。歸。寢。阿。龍。仍。伏。亭。際。至。於。遲。明。始。登。樓。假。寐。闔。者。忽。持。書。入。言。有。人。投。書。門。隙。中。上。書。公。子。之。名。書。曰。足。下。劍。術。殊。不。弱。余。行。徧。天。下。汝。足。稱。勁。敵。矣。此。十。日。中。請。足。下。勿。高。枕。臥。爾。我。均。壯。士。必。此。殭。彼。仆。而。後。止。斷。無。兩。雄。同。立。者。也。黑。熊。拜。啓。阿。龍。得。書。恍。然。曰。此。賊。乃。通。品。吾。頗。恨。其。失。足。事。馬。寶。賊。子。也。停。

午。曹夫人以人趣阿龍同飯。楚英亦出。謂阿龍曰。兄夜來辛苦矣。阿龍曰。是胡足言。兄正欲伺罅出鏢中賊要害。而姑丈適出。賊飛捷。卽趁槩鋒登牆。兄不難追出牆外。防有援賊。故寧守勿進。夜中妹當移居。空其繡闥。俾賊無所覘。賊更來。必不趨故道。兄當移嚮以偵之。顧姑丈安在。曹夫人曰。府中傳呼。晨已趨謁大王。議兵要矣。飯時。女頻頻慰勞。旣罷飯。移時。而世渭已自府中歸。言湖南頗占勝著。而清廷嚴旨切責。尙善頓兵不進。清提督桑額一軍。尤罷茶。不盡死力。然我軍不得武漢。死守湖南。終爲釜中之魚矣。大王言。旦晚將大出兵。而馬寶決不置我於地上。必請王調我於軍前。然無故興戎。肆亂海內。吾雖親族。初不直王所爲。但求早死爲幸。唯吾愛女。終不忍使之玉

石同燼。今性命寄之呼吸。而逆賊又時以刺客來。殊令人寢食皆無寧謐。阿龍因出刺客書。視世渭。世渭曰。刺客與我何仇。乃甘心我家。阿龍曰。姑丈勿憂。吾誓以死報。曹夫人泣曰。亡兄愛我。殊摯。不圖阿龍亦篤其骨肉也。

第六章

時爲康熙十五年丙辰三月。下澣。刺客不至三日矣。女如阿龍言。屏居別室。以侍婢粉兒居閣中。粉兒年十七。頗有姿首。女待之厚。粉兒誓以身報。坦然閉閣而寢。一無疑畏。時近晦。無月。阿龍伏閣下。三更向盡。有物瞥然如蝙蝠掠阿龍頭上而過。阿龍弗動。凝望閣上。殘燈猶耿耿。外射隱隱。見賊影伏窗內。窺咄嗟間。已入閣中。燈滅。賊出。態

頗。累。重。不。如。來。時。之。輕。健。阿。龍。知。可。圖。矣。一。鏢。猝。發。已。中。賊。脛。脛。弱。賊。與。粉。兒。並。墜。隱。隱。已。閃。刀。光。賊。著。創。尙。能。蹶。起。阿。龍。不。待。刀。至。更。發。一。鏢。中。賊。因。立。殭。於。地。阿。龍。呼。燭。家。人。已。宿。備。羣。燭。爭。集。粉。兒。中。迷。藥。殭。臥。賊。年。四。十。許。鏢。入。左。眼。血。湧。出。半。顛。盡。赤。然。尙。能。呻。而。言。曰。汝。終。好。手。洞。黑。中。鏢。無。虛。發。世。渭。曰。我。家。不。能。殺。人。不。如。更。去。其。一。眼。以。絕。後。患。阿。龍。曰。善。卽。以。劍。尖。點。其。右。眼。立。盲。拔。出。眼。中。及。脛。股。之。鏢。以。善。藥。敷。之。縛。而。待。旦。付。之。有。司。時。馬。寶。之。黨。盛。聞。世。渭。家。得。刺。客。馬。寶。子。尤。怒。顧。不。能。救。有。司。竟。置。刺。客。於。法。馬。寶。子。乃。馳。函。告。其。父。馬。寶。嚼。齧。大。怒。卽。馳。書。告。三。桂。請。增。兵。援。長。沙。且。乞。世。渭。同。來。時。爲。五。月。三。桂。下。令。更。以。萬。衆。援。長。沙。加。世。渭。總。兵。銜。付。馬。寶。軍。

前調遣曹夫人及楚英得報。顏色喪敗。世渭則乾笑不語。阿龍隅坐。視世渭。默聽。指麾。世渭曰。余前二日。已得消息。終不免此行。我生不辰。乃託身吳家。大王以暮氣憤兵。欲遂其谿壑之慾。不體天心。不察時變。敗可立待。余卽至軍前。馬寶亦不能猝加陷害。必取一至。窘極難之事。令余當之。幸而獲濟。則續續。窘我以艱鉅。若一蹶不振。卽用爲予罪。軍令在握。何不可者。況世琮尙日夜搆我。我卽冤抑。何人爲余原洗。丈夫死耳。所恨死於不義之中。至於反顏降清。使吾妻子爲僂。余決不爲。今幼子只數歲。阿英長成如許。未有壻家。語至此。以目視阿龍。阿龍垂頭不敢正視。世渭卽顧曹夫人曰。余有小麓。封鏽甚固。遺囑卽在其中。我此行決無倖。陳夫人者。近已出宮。長齋於金馬。

山之曇花菴智哉夫人也。大王年高世璠非才雲南一隅決不足以支北來之師我行夫人必同阿英時至菴中朝陳夫人爲異日避兵脫禍之地其餘家事盡託之阿龍阿龍雖非吾子然其孝義過於吾之所生多矣。曹夫人及楚英哭不成聲阿龍亦嗚咽弗止家人默然片晌世渭起曰夫人可爲吾治行事卽匆匆入宮朝王並請師期三桂曰岳州喫緊岳樂兵已深入湖南岳州一破則全境瓦解今圖海兵尙在懷慶應援不及我軍盡銳救岳則敵師必卻吾已令人說吳啓鎮尙之信廣東總兵苗之秀悉來歸總督金光祖亦納款廣東大勢已定更合閩粵兩軍進趣則江南江西亦在吾掌握爾此行與馬寶諸人和衷共濟大事或可成也世渭欲陳馬寶之奸顧爲三桂威

燄所懾。不敢進語。唯唯而出。行期已屆。曹夫人母子及楚英哭送之。門阿龍則並騎出城。世渭馬上無言。別時但曰。爾可著意。楚英無令更落賊手。家事則盡畧之遺囑中矣。阿龍掩淚而反。曹夫人曰。龍兒。吾家細弱。滿眼將軍復長征在外。老身家事聽汝而行。汝雖吾姪。逾於吾子矣。阿龍曰。男子固有前望。今兒陷身於此。坐待玉石之焚。雖年不滿三十。而萬事灰冷。所以不死者。心感姑丈之恩。請與姑母一家同其生死。自今日始不能更言大事。但爲家人母子之樂。以消長憂萬事。儘有天命。人心何能豫測。楚英曰。龍哥試想。老父入楚。命懸大仇之手。以妹終身之故。累及老父妹。又何用生爲。阿龍曰。姑丈德積於躬。皇天垂眷。寧有意外之虞。語次。粉兒以白蓮花五朶進。夫人

日。今。年。蓮。花。開。何。早。也。阿。龍。曰。舊。曾。見。姑。丈。藏。仇。實。甫。唐。宮。賞。花。圖。寫。明。皇。妃。子。同。在。連。昌。宮。畫。樓。重。疊。苑。樹。葱。鬱。宮。牆。一。帶。桃。樹。青。青。間。以。密。竹。竹。葉。鉤。勒。精。細。傅。以。石。綠。粲。然。動。目。姑。丈。言。已。命。英。妹。題。詞。此。圖。當。必。無。恙。今。家。人。聚。而。長。愁。初。無。情。趣。胡。不。出。此。名。畫。共。賞。且。以。觀。英。妹。珠。玉。楚。英。微。哂。曰。妹。特。應。嚴。命。而。作。鴉。塗。寧。真。能。詩。者。龍。哥。若。不。見。哂。方。敢。出。其。敝。帚。卽。令。粉。兒。就。書。畫。櫥。中。檢。十。洲。手。卷。卷。長。丈。有。五。尺。高。一。尺。有。五。表。以。蜀。錦。藏。以。紫。檀。之。匣。匣。啓。香。氣。觸。鼻。甫。展。二。尺。許。中。有。乾。海。棠。花。片。數。點。楚。英。笑。曰。當。日。展。畫。於。花。陰。海。棠。因。風。適。落。數。片。於。卷。中。吾。卽。因。而。捲。之。已。隔。年。矣。因。以。纖。指。檢。去。乾。片。阿。龍。曰。惜。哉。請。以。見。惠。女。曰。乾。矣。阿。龍。曰。經。妹。收。藏。雖。隔。年。

花。蛻。仍。可。寶。也。女。不。言。二。頰。絳。如。玫。瑰。粉。兒。掩。口。而。笑。女。怒。之。以。目。
阿。龍。僞。爲。無。見。仍。籠。其。花。片。納。之。懷。袖。展。卷。不。已。絹。素。旣。盡。畫。赫。然。
出。先。作。驪。山。輦。道。高。槐。古。柳。悒。悒。蔽。天。道。左。有。衛。士。十。餘。人。或。解。鞍。
坐。石。或。飲。馬。或。三。數。人。蔭。槐。陰。而。立。談。皆。長。劍。陸。離。狀。態。英。猛。更。下。
則。宮。牆。一。帶。密。竹。出。牆。間。以。桃。樹。闕。門。已。見。輦。路。彎。環。直。趣。萬。松。之。
中。零。星。見。宮。監。有。捧。盒。者。持。節。者。漸。展。人。數。漸。多。而。朱。樓。廣。殿。一。色。
界。畫。千。門。萬。戶。歷。歷。皆。有。美。人。純。爲。宮。粧。宮。柳。無。數。迷。不。可。得。路。柳。
盡。處。荷。花。彌。望。石。闌。傅。以。薄。鉛。微。渲。赭。石。勢。極。修。廣。明。皇。修。鬚。偉。貌。
紗。帽。而。凭。闌。玉。環。貌。微。豐。挽。靈。蛇。之。髻。加。步。搖。但。見。半。身。執。白。紈。扇。
風。致。如。仙。明。皇。以。手。下。指。似。有。所。見。迴。面。語。貴。妃。其。後。宮。娥。二。十。餘。

輩分行立侍。一人立近羯鼓之側。輩中七八人咸執樂器。柳外隱隱見驪山葱翠。欲滴矣。阿龍展觀。歎賞無已。畫盡而楚英之題詞已見。詩爲七言古體也。詩曰。

垂楊碧。裊驪山宮。宮門衛士羅青驄。雕甍文瓦出天半。如霜宿扇。飄槐風。緋桃久謝。宮竹綠。鈿車連軫。人如玉。蟬衫鱗帶。釧聲微。三五年時。花映肉。波浪黃龍金畫旛。羅巾阿監如星繁。官家新御凌波殿。妃子盈盈侍玉尊。清池一道初經雨。蓮花低作紅衣舞。翠髻宮人捧碧筩。藕腸細細情絲吐。白玉渠成消夏灣。金泥紙疊龜茲譜。羯鼓聲高衆樂揚。映花鹵簿排斜陽。綠陰隱隱涵金輅。黃帕輕輕覆御牀。太真微笑傳天語。御廚湖日新羹煮。匆匆小燕趣華清。

晚。蟬。聲。裏。拖。殘。暑。迴。想。樓。東。十。斛。珠。粉。痕。零。落。朱。顏。癯。漁。陽。頃。刻。
喧。鼙。鼓。枉。費。辛。勤。製。此。圖。

阿龍讀已。笑曰。妹真善學青邱矣。通首音節諧婉。兄雖武人。亦頗解詩之佳處也。

第七章

世渭已赴湖南。阿龍長日守家。防有意外之變。亦不敢出。刺客既伏。法後無繼者。夜中備禦亦漸緩。女長日念父。恆請阿龍至五華山。探問軍事。顧不得入。問要人。但聞湖南一軍。與清軍搏。時有利鈍。閩浙粵東。雖糜爛。而荆襄武漢。終未下。陝西王輔臣。又爲張勇趙良棟王進忠三大將牽掣。旦夕挫敗。阿龍所得者。只此而已。既歸。朝曹夫人。

言湖南近狀。夫人曰。以區區南中數省。當北來日滋之師。縱使朔方健兒。見敗於大王之勁卒。然滿洲索倫諸雄兵。一時尙未盡動。此勁敵未可輕視。吾家鎮軍與王爲懿親。事敗必無獨全之日。老身旣嫁吳家。義無可辭。唯吾姪盛年。負此絕藝。奈何亦隨蟲沙同化。卽吾愛女及弱子。亦萬不忍罹彼鋒鏑。語次。汎瀾不已。阿龍曰。兒早晚當隨軍而出。相時度勢。尙可自脫。英妹才藝素見賞於陳夫人。今夫人已自阿香宮遷居曇花菴。菴在金馬山之麓。林木陰森。人跡罕至。將來城破。姑氏可同弟妹匿跡彼間。官軍入清王宮。陳夫人旣已出家。官必不問。姑妹及弟。或可得全。兒不定。將隨官軍入此。幸得相見。則一家復團聚矣。夫人曰。汝言官軍殆投身清營乎。阿龍曰。然不至彼間。

萬不能死。馬寶且月師示寂之時。言兒遇天水。則功名立。天水非趙耶世之英雄。唯趙良棟將來。秦蜀肅清。則趙必移軍南征。兒投身趙軍。尙能保全。姑氏一門。苟不謀此。再無他法。女曰。兄言良是。妹當卽日往謁陳夫人。阿龍曰。兄以騎從。於是命輿赴金馬山。輿緩。阿龍以馬旁輿而行。女自輿中。以纖指指點煙樹二釧。相觸瑯瑯有聲。阿龍卽驟馬指述沿道地名告女。已而輿近山門。有二衛士嚴守。問輿中何人。阿龍下馬。言吳鎮軍女公子。爲大王親族。祇謁夫人。衛士入門。叩木魚庵之內。門闢。有垂髻一女。並一媪。出見女。則大悅。曰。小姐至矣。女侍內奔。移時卽出。將夫人命。飭女進謁。小徑通幽。花竹紛雜。中夏綠陰如織。直通垂花之門。簷際懸白鸚鵡一架。呼曰。俗客至矣。女

侍大笑。入門。有芙蓉之幕。下垂至地。幕啓。已聞龍涎之香。知漸近。夫人禪房。密竹出簷。陰沈如墨。禪堂左側。爲月門。入門。時爲客堂。堂之側。復有小門。則一廣庭。奇石插空。玲瓏如鬼工所琢。盆蓮十數。南嚮。禪房五楹。門外垂楊二株。已高尋丈。以外。倡條披拂。惛惛中。已見堂額。書曰一指堂。蓋用俱胝和尚語也。夫人已披緇落髮。著道帔。默坐蒲團。視前此宮粧。已判若兩人。玉容亦漸老。額上已微見皺紋。女入。卽合十參拜。夫人立起扶掖。女曰。婢子久不奉侍夫人。聞夫人梵修於此。敬來膜拜。候夫人起居。夫人曰。今尙稱夫人乎。女曰。夫人深入佛海。透悟禪宗。證果非難。然名分終在。夫人未證法華三昧。至靈山之先。婢子事夫人。終未敢用大師之稱。謂夫人笑曰。愚哉。小女。汝卽

稱我爲大師。不可耶。女亦笑曰。今不得不如大師之命。坐定後。夫人曰。汝聞湖南消息如何。女因言馬寶不直己父。已調軍前矣。夫人曰。鎮軍王之懿親。馬寶雖狡。烏敢肆其荼毒。女因述刺客夜來之事。夫人大驚曰。此妙手空空兒也。汝胡以不罹其禍。女復述阿龍抗賊。奪取粉兒。並剗賊目。語時。甚有詞況。夫人顏色大動。卽曰。不圖汝家。乃有英雄人。今其人安在。女曰。爲婢子表兄。今日以騎夾輔婢子至此。尙在庵外。夫人曰。胡不令入見我。女曰。凡素之流。胡敢冒謁禁籞。夫人曰。老身衲耳。曹生檀那也。可以入面。卽呼侍者。傳言。趣曹居士進見。阿龍聞言。大駭。知無可抗。則自整巾服。入謁。時髮已漸長。能作小髻。黑鬢朱顏。氣概英糾。拜於禪堂之下。自稱萬死。夫人曰。居士年幾

何矣。阿龍惶恐。謝曰。小人曹壺。烏能辱夫人居士之稱。犬馬之年。已二十有四。夫人曰。爾劍術何人所授。對曰。堵師也。夫人曰。堵師何人。阿龍不敢斥言。尼僧。女代答曰。其人有道行。如大師。夫人曰。尼也。阿龍鞠躬曰。是爲小人之師。夫人無言。視阿龍久之。復視楚英。微笑。不語。乃曰。居士暫就外廂。老身尙與女公子作微談。阿龍復鞠躬而出。夫人曰。曹生殊佳士。曾讀書否。女曰。不惟讀書。且能詞翰。夫人曰。偉哉。曹生當日江南陳定生。吳次尾。冒辟疆。侯雪苑。方密之。諸人皆以文采掩映一時。然頗狂傲。均不如曹生文武兼資。且謙謹和悌。殊佳品也。爾亦眷注其人否。女顏色大赧。垂首不能答。夫人曰。實相告。老身少年曾歷金迷紙醉之場。又陷身賊中。閱人至多。雄傑如黃虎山。

然。獷。而。不。文。而。劉。良。佐。劉。澤。清。輩。皆。擻。豎。小。人。高。傑。則。劇。盜。耳。均。不。名。英。雄。至。於。名。士。有。殉。節。爲。高。者。然。終。令。人。難。近。大。王。固。英。雄。蓋。世。不。爲。郭。汾。陽。寧。爲。黥。布。鐘。漏。垂。歎。甘。心。稱。戈。內。嚮。以。遺。重。患。於。子。孫。滋。非。計。也。今。日。粉。白。黛。綠。者。列。屋。閒。居。老。身。逆。測。禍。已。不。遠。故。梵。修。於。此。今。湖。南。雖。能。堅。守。然。糧。運。不。繼。兵。力。有。限。雲。南。決。難。自。全。恨。爾。如。花。之。貌。亦。淪。是。間。爲。可。傷。也。縱。使。曹。生。有。力。如。虎。寧。能。堅。抗。北。來。之。師。未。知。若。母。夫。人。盛。意。如。何。若。老。身。者。願。汝。從。曹。生。偕。老。也。語。次。太。息。不。已。女。且。羞。且。感。不。期。淚。盈。於。睫。夫。人。沈。吟。久。之。復。曰。苟。有。禍。變。出。諸。意。外。者。爾。可。同。母。弟。避。吾。菴。中。女。謝。曰。老。母。之。意。亦。正。爲。此。夫。人。曰。後。院。尙。不。乏。庭。舍。頗。幽。淨。多。芭。蕉。足。容。爾。之。一。家。女。興。辭。夫。

人曰。納久不茹葷。媿無杯酒之歡。遂送女至階下。女檢衽出。輿已停。菴外。阿龍仍以馬往。道中問曰。夫人何爲賜見顏色。女曰。夫人品第。晚明。人物以兄爲第一。阿龍笑曰。夫人獎借。母乃太過。然夫人久久。視兄復視妹而微笑。此何意耶。女曰。彼間林杪有塔。亦僧寺耶。阿龍知女亂以他語。卽亦不問。

第八章

時清安親王岳樂。抵江西。簡親王喇布。鎮江南。三桂遂下令。親自督師。雲南全城震動。三桂擐甲。擁衆出城。自常德至松滋。布戰船於虎渡上游。截荆岳大兵。使不相應。陽言將攻荊州。決隄灌城。潛分岳州之衆。踞宜昌東北之荊州鎮。令王會、楊來嘉、洪福、掠穀城、鄖陽、均州。

南漳。部署甫竟。而順承郡王勒爾錦。以貝勒察尼。都統宜理布至。三桂意氣甚盛。合二萬餘衆迎敵。察尼以滿洲勁旅居先。奮其死力。怒馬如潮。南軍不能當。遂大敗。三桂勒兵歸鎮。定策。北軍新來。利速戰。則堅壁深濠以守。明年春。三桂遣大將七人。犯廣東。授尙之信。招討大將軍。時夏國相敗。安親王攻長沙。三桂命馬寶。高起隆。由岳州赴援。於是世渭至軍久矣。隸馬寶麾下。馬寶僞爲和悅之言。要結世渭。世渭終不一顧。馬寶憾次骨。旣以兵入長沙。令世渭爲前敵。以三千衆行。遇清兵於瀏陽。清兵皆騎。箭如飛蝗。世渭披重鎧。奮槊。所部蒙盾。孫進以刀斬馬足。馬踣。後踐其前。尸高如阜。清兵遂退。馬寶以後軍進援。清兵敗績。南軍遂長驅入長沙。論功。世渭竟爲馬寶所抑。不

以聞。時三桂遣別將韓大任、高得捷等陷吉安。與清兵戰於螺子山。擊卻清兵。進陷醴陵。斷岳樂後路。捷至。三桂自松滋移軍屯嶽麓山。時陝西王輔臣兵敗。閩耿精忠、粵尙之信並通款於簡親王。廣西孫延齡妻四貞、孔有德女也。慙息延齡歸順。謀定將釋馬雄鎮。三桂聞耗。命吳世琮以輕騎襲延齡。斬之。馬雄鎮尙窮閉節署。家衆死者纍纍。命幕客隨長子世濟出。世琮以人取馬雄鎮。雄鎮不屈。世琮斬其幼子二。馬題字烏金鋪。引頸就死。凜然不屈。世琮異之。時征南將軍穆占與安親王夾攻長沙。馬寶不出。日以世渭應敵。大小十七戰。世渭力窮。怒馬陷陣而沒。馬寶聞耗。笑曰。汝尙能拒婚。謂吾子不能偶若女邪。三桂聞世渭陣歿。頗歎惋。遂寓書其家。自移兵入衡州。復以

兵分犯江西、南安、廣東、韶州。兩粵騷然。迨凶耗一至。先爲阿龍所得。不敢遽告夫人。痛哭經夕。目盡腫。然知不能終閱。則徐至夫人臥室。夫人甫起。見阿龍目腫已覺。卽嗚咽言曰。阿龍。長沙信至耶。阿龍長跪。放聲哭曰。姑丈陣殞矣。夫人哀號立暈。聞樓級中。悲聲大作。女已奔入。抱母而號。粉兒急進以茗。夫人略甦。呼曰。天乎。馬寶也。此賊不以罪死吾夫。決令將孤軍搏大敵。坐視不救。力疲死耳。今將奈何。女顧阿龍曰。龍哥。焉得信。阿龍曰。府中以書至。且有獎卹身後之典。女曰。吾父旣死。得獎何爲。立命家人發喪。招魂於城外。夫人日夕哭。幼子阿盛。僅十一歲。女則淚陣慘黛。須斯不離母側。阿龍外應弔客。內慰孤孀。夫人愛逾己子。復以人告喪於陳夫人。夫人亦以侍者來唁。

且寓書楚英。請其節哀。用慰老母。百日以後。阿龍與夫人謀葬。世涓衣冠於金馬山之北。女深以爲是。時已冬殘。窗外盆梅盛開。女素服至梅花之次。飄然如羅浮之仙。阿龍無心。行及窗外。梅香沁腦。不期昂頭見女。大驚。其豔女感阿龍爲己家。盡力且居其父喪。哀痛類於所生。則形迹盡忘。不期微笑承迎。問曰。龍哥。劬苦至矣。妹思大王雖舉大事。尙未僭號。府君墓碣宜作何書。阿龍愕然不能答。久乃曰。成敗未定。萬不能直書姑丈生時官爵。以招後來疑忌。不若改書姑丈別號。曰吳子東之墓足矣。子孫得所表識。備春秋展拜亦佳。女曰。龍哥大解事。語時流波送睽。似萬縷深情。迸爲一線柔媚之光。直射阿龍心坎。自是以來。心念陳夫人之言。益思以身自託矣。明年戊午。爲

清康熙十七年。安親王岳樂。攻平江。湘陰。征南將軍穆占。攻永興。拔之。茶陵以下。十二城。皆爲所有。三桂兵勢大孤。然尙能戰。以精卒犯永興。清兵憑高壘於城外。可十餘處。三桂嚴鼓進兵。衆無不以一當百。盡奪清之營壘。清軍退屯城內。都統宜理布。哈克山。戰歿。宜理布。北軍勇士也。旣死。清營氣大挫。三桂大營踞河外。設重圍。困永興。以別軍犯郴州。清將軍顧岱。敗績。斂軍歸永興。三桂旣勝。自以年鬢高。欲及身爲帝。以自娛。遂定都貴陽。

第九章

貴陽。本西南夷羅施鬼國地。漢屬牂牁郡。元改順元路。明初設貴州宣慰使司。隸四川永樂間。置貴州。初設程番府。後改貴陽府。東阻五

溪。西距盤江其民種類非一。習俗各異。非建都形勝地也。三桂年已六十有七。欲僭號以自娛樂。然其大出兵時。世璠尙留守雲南。三桂重兵悉駐永興。攻圍嚴城。三桂知耿尙二軍已通款清廷。孤軍必難自逞。計惟稱帝。以王侯封號。鼓勵諸將。或能得其死力。遂頒詔稱昭武元年。設朝於貴陽城中。三桂冠平天冠。龍袞。執圭。文武袍笏。拜丹墀之下。時微雨。陰沈。天色愁黯。三桂甫登座。羣臣嵩呼未畢。忽有黑犬一。冒雨突入殿廷。衛士咸不之見。犬一躍竟登案上。外向而坐。適距三桂之前。發聲嗚嗚。諸將大驚愕。顧失色。三桂以圭擊去之。犬復大嗥。厥聲尤悲。三桂怒絕。欲宣言問諸人以休咎。而喉中如有所哽。噎不可止。遂罷朝入宮。噎益甚。噤不能聲。示意左右。取其孫世璠於

雲南未至。三桂死矣。外史氏曰。明亡。廷臣死節者多。而降賊者半。爲賊所縶。撈而死者亦半。賊走降清。有以名位終者。貳臣傳中歷歷也。然皆不如三桂之兇狡降清。不足論。乃以陳圓圓之故。陷父於死。復以弓絃拉殺桂王。悖理反常。已同梟獍。想此犬或爲吳驤厲氣所化。以驤不忠於明。雖名爲人。其實犬也。犬尙戀主。驤則無之。吾以犬鬼加驤。尙爲逾分也。三桂已死。西兵皇皇然。方光琛、郭壯圖二人爲三桂信重之臣。遂發令撤永興之圍。嚴屯貴陽。備儀衛。迎世璠於雲南。時世璠仍居五華山故宮。荒淫無度。漠然不審兵要。以世次適長宜立。故方郭二人議定。迎卽大位。自三桂兇問至。闔城人皆縞素。阿龍聞耗。入告夫人。言三桂一死。雲南無可守。指顧立破。吾家必難瓦全。

不如乘此外出從軍。冀得一面。趙良棟應月師所遺之讖語。夫人曰。爾言良是。顧吾愛女及幼子焉依。且吾年老家無繼男。所恃者汝。汝行而清軍破城。玉石不辨。且奈何。阿龍曰。事急往從陳夫人。必無恙。夫人宮中已除籍。滿軍卽入清五華宮。亦決不至曇花菴。兒果得面。趙將軍必能爲地。夫人曰。阿龍。汝視妹子如何。阿龍面赤不能答。夫人曰。試言之。阿龍曰。妹子天人也。夫人曰。名爲天人。乃聽其膏於亂軍之刃。汝心忍乎。阿龍曰。果有不幸。壺願以性命殉之。夫人曰。殉之何名。阿龍曰。義耳。夫人曰。中表之誼。曾聞以性命相殉耶。阿龍語塞。夫人不語。久之曰。阿龍。汝不悅若妹乎。阿龍曰。姑母語乃至奇。壺果不悅。妹氏何爲。出百死與刺客相搏。夫人曰。設當日不幸爲刺客所。

得歸之馬子。汝意如何。阿龍曰。壺策妹氏必死。壺亦無生全之望。夫人曰。然則汝與妹氏同命矣。阿龍曰。義發自中。然亦由姑氏深恩所致。欲窮壺以所以。然壺亦莫能自剖。夫人笑曰。情耳。以上所言皆戲也。妹氏無歸。必歸汝。汝意云何。阿龍疾趨而跣抱夫人之膝曰。母也。吾天乎。壺萬死。胡足以報母之德。夫人欲泣欲笑。喉哽不能發聲。但以手拊阿龍之髮。言曰。吾兒起。吾得汝爲壻。較得賢子勝矣。於是母子相見。無言而粉兒已一一聞之。喜動顏色。疾趨登閣。告楚英語。未半。楚英方刺繡。以金剪除線梢。幾落其剪。然尙自支厲。卽以剪指粉兒。怒之以目曰。汝勿喋喋。粉兒愕然而退。女置剪案上。以兩手按膝。仰首視畫梁。久之始噫氣。則又往來徘徊於閣上。外史氏曰。試問之。

讀吾書者。女此時心緒如何也。

第十章

時爲八月。世璠下令。將赴貴陽卽位。凡雲南壯士。欲從軍者。聽入尺籍。阿龍入告夫人。將赴將軍林興珠麾下投軍。而楚英方侍母側。顏色頓變。阿龍遂不竟言。相向默坐。夫人曰。汝已報名入軍府耶。阿龍曰。然。此壺萬不得已之用心。生平深信月師之言。計此行必有佳兆。女曰。龍哥句阿娘老矣。淚落如珠。且掩面嗚咽。夫人亦哭。阿龍昏眩。無主不知所云。計不行。則玉石同燼。一行而母女難堪。久乃言曰。英妹須強力自鎮。壺非禽獸。寧不知阿娘之恩意。如天顧不趁此一行。壺萬無自脫之日。貴陽諸將帥去順效逆。以理策之。必無全地。屬聞

關中已平。而北來諸親籍。均非吳王之敵。清廷必以趙良棟來。趙來。而貴陽諸將。又非趙之敵。雲貴二省。決不能守。雲南一破。吳氏一門。必無遺噍。幸阿盛未長。一家細弱。不爲人指目。可以斂避。陳夫人久經患難。智慮深沈。壺行後。母妹及弟。可潛赴曇花菴。依夫人以居。壺果從趙將軍入城。必先至菴中。與母妹相見。妹幸爲我侍老母。壺今亦吳氏人矣。女心動。不能答。夫人曰。龍兒言然。兵間不易通書。爾能自至。老身亦決留此殘年。待爾。女曰。龍哥以何時行。阿龍曰。大致在後日。世子明日發雲南。林將軍遲一日行。女曰。然則我家尙有兩日之聚。夫人曰。明日略治杯斝。爲吾兒祖道。祝兒沿道平安。阿龍亦仍女之稱。謂曰。謝阿娘恩意。女皆了了。於心。此時彼此性情如精金入。

冶。生。金。與。熟。金。鎔。而。爲。一。謂。之。骨。肉。之。談。心。可。也。謂。爲。夫。婦。之。敘。別。
亦。無。不。可。女。連。夜。用。二。尺。絹。素。寫。成。桂。館。送。行。圖。填。一。詞。於。其。上。調。
寄。三。姝。媚。云。

瀕。行。偏。未。準。正。秋。花。盈。盈。畫。廊。晴。穩。語。自。心。搏。儘。陽。歡。相。對。頓。成。
愁。吻。萬。疊。兵。雲。誰。解。說。歸。期。能。近。何。況。長。途。煙。黯。山。深。中。秋。垂。盡。
初。覺。心。酸。還。忍。偏。一。一。愁。根。夢。中。抽。筍。曉。鏡。撩。人。肯。再。拈。爾。許。
碎。脂。零。粉。道。遇。重。陽。須。耐。彼。霜。風。淒。緊。復。念。曇。花。菴。裏。憑。闌。瘦。損。
圖。成。不。敢。遽。出。藏。之。袖。中。竟。日。抵。暮。阿。龍。以。急。裝。歸。凜。然。如。天。神。夫。
人。曰。龍。兒。作。如。此。結。束。殊。不。媿。爾。岳。父。生。時。也。女。聞。言。顏。色。不。動。蓋。
已。入。粉。兒。之。言。知。此。身。已。屬。阿。龍。故。詞。中。語。氣。初。無。斂。避。儼。然。一。贈。

外之作飯罷。夫人起而更衣。阿盛與女同在廳事。女欲言復止者屢。阿龍已覺。卽曰。妹似有言。今骨肉分離。只在後日難中發論。皆發情止。禮可勿顧。忌女神定。從容言曰。刺客再來。龍哥以百死脫我於難。銘恩五內。不能殫述。宵來以絹素寫桂館送行圖。並題詞其上。畫旁詞鈍。聊以贈行。不幸雲南不保。全家悉化。蟲沙則龍哥留此。蔑護者作。斷腸之紀念。亦示弱妹念恩之意。語至此。哽咽不能成聲。阿龍盪悲且喜。急索其畫。以兩手外張。稱素默念其詞。淚落如繩。防畫本爲淚所沾。故離之稍遠耳。一詞讀至三四十遍。尙不釋。而畫中景物。都如無見。女不得已。言曰。龍哥視吾畫如何。阿龍始恍然。知有畫也。就燈細觀。中作桂樹數株。其中寫意爲家人團坐圖。甚有姿致。卽曰。此

等筆墨。近徐文長。於不經意中得神采。然詞之情深。語摯。雖瓣香。沂孫。究別成一格。所謂意內言外者。此是矣。兄卽血戰伏尸。亦當寶裹。此畫於胸際矣。

第十一章

世璠既至貴陽。拜方光琛爲大學士。晉郭壯圖爲黔國公。改元洪化。諸將均有陞賞。時貝勒尙善合大兵力戰。世璠兵敗於洞庭湖。清兵薄岳州。尙善以疾卒於軍中。清廷拜察尼爲大將軍。代尙善。康熙帝遂諭南來諸大將曰。三桂既死。餘衆必潰。宜進兵速勦。又曰。自三桂煽亂。所在官民多被誘惑。陷身彼中。莫能自拔。朕已洞悉情形。屢頒勅諭。廣示招徠。開其自新之路。今三桂已死。念在彼文武官員。皆國

家赤子兵民。非必甘心從亂。或志存忠義。遲徊待時。或勢被迫驅。無由歸化。朕甚憫焉。爾等往布德音。相機勸諭。令翻然悔悟。爭先來歸。有密謀內應。擒斬渠魁。及率領兵民。獻城納款者。俱赦其罪。論功敘錄。爾等殫心籌畫。以副朕意。察尼兵略不如尙善。然所部頗能戰。而前鋒統領杭奇。頗有勇略。世璠大將吳應麟。令江義巴養元。杜輝三將。乘風駕巨艦二百艘。犯柳林嘴。察尼以勁旅擊卻之。杜輝有子在軍。知世璠不足爲。又讀康熙帝赦書。謀以所部降。爲吳應麟所覺。斬杜輝。於是諸將頗解體。時阿龍已至軍久。時爲康熙十八年乙未。見諸將互相猜沮。而糧運復不繼。乃入謁將軍林興珠。坐定。林將軍曰。當日世渭將軍。爲馬寶所忌。力戰而死。馬寶陰毒左計。排陷善類。決

無良果。方今大王新喪。諸將疑貳。大學士柄政。不足以羈縻人心。清廷已肅清陝右。我軍陳華、李超、王度、冲等一一迎降。華容、安鄉、湘潭、衡山各州縣望風解體。雲貴孤軍。初無後繼。何以集事。足下以盛年從軍。當有卓見。足以啟發鄙人。阿龍曰。大王兵略及其生平。行事大類黥布。布反梁地。出死力與項王角者。正以牽掣成臯之後。項王之不能平布者。有漢高重兵扼滎陽。成臯間也。故布雖成功。亦恃漢之兵力。吳王之在山海關。雖擁重兵。然斷非李闖之敵。幸賴多爾袞。以北海勁卒繼其後。因得成功。擔爵錫圭。殊榮過於黥布。王不知賴清之力。橫行天下。轉竊以爲己能。無故稱兵。而閩、廣、陝、黔同時響應。東南爲之震動。然終始不得。荆襄無以進。規武昌則亦萬萬不能北。

向。中。原。矣。矧。關。中。一。軍。又。爲。張。勇。趙。良。棟。王。進。寶。所。遏。茲。聞。王。輔。臣。已。敗。轉。旆。入。川。則。雲。南。大。勢。亦。頗。岌。岌。察。尼。勒。爾。錦。岳。樂。諸。人。均。不。足。慮。而。我。軍。得。以。時。敗。時。勝。者。以。諸。人。有。野。戰。之。能。不。能。通。籌。全。局。也。今。諸。路。敗。岷。清。廷。必。合。軍。來。搏。方。光。琛。初。無。遠。圖。而。新。王。孺。穉。不。諳。兵。謀。吳。將。軍。世。琮。尙。能。軍。然。狡。悍。冒。進。久。亦。必。敗。以。末。弁。策。之。不。出。朞。年。雲。貴。瓦。解。矣。林。將。軍。曰。足。下。言。然。吾。意。欲。反。正。汝。意。云。何。阿。龍。不。敢。答。林。將。軍。曰。左。右。皆。余。心。腹。必。不。外。洩。但。語。何。礙。阿。龍。曰。此。如。天。之。福。也。林。將。軍。曰。吾。計。決。矣。

第十二章

楚英自阿龍行後。復至曇花菴。陳夫人已易縞素。方向水月象前禮

梁王懺爲吳王資冥福。女入拜於座下。陳夫人仍敲木魚。吐梵音。幽咽不堪入耳。移時梵音止。夫人合十膜拜。女亦拜諸其後。夫人起就蒲團。令侍者淪茗。命坐。夫人曰。近在家。何作。聞曹生遠征。奈何。以此盛年。爲倒行逆施之事。女不敢吐實。但曰。在家無事。故爾從軍。夫人歎曰。如此好男子。惜哉。邇來聞湖南消息。岳州糧盡。諸將皆降。吳應麟收殘卒。挾輜重。走長沙。而長沙守將畏北軍。亦棄城遁。北軍已自荊州渡江。湖南將次歸於清國。嗟夫。吳應麟輩。足了大王事耶。余自王薨後。心緒益冷。如冰雪。自知去死已近。胡彼蒼。斬我乃不卽死。留此老眼看北軍掃蕩。吳宗良可悲也。女不能猝答。然聞夫人詢及阿龍計行已數月。不得家書。心滋戚戚。因回頭見几上有經函二卷。展

視則金泥之本。趙松雪書蓮花經也。書法秀媚入骨。女愛不忍釋。

此經

爲三桂攜滇者。後布施圓通寺。今殘。夫人曰。經爲王白北攜來。聞老身長齋誦佛。而賜

老身。菴中卽用此爲伴。旣愛古人名迹。亦用以懺悔後來。女再三諦玩後。珍重裹以黃綾。恭陳案上。卽曰。前蒙夫人慈訓。言事有不測者。可以遷居菴中。婢子家無長物。原可襍被奉母弟同來。但恐夫人莊嚴清淨之地。污及塵氛。適成無量罪孽耳。夫人曰。此不惟無罪。且足增余功德。若母謾謾有林下風。老身心儀久矣。但恐茅菴伊蒲之饌。不足供應貴人。女起拜曰。敬謝夫人恩覆。婢子得依圓光之下。不至墜入劫塵。足矣。遂興辭。夫人略起蒲團爲禮。女匆匆出。輿行里許。卽見家人自遠而來。言曹公子有家書歸。女喜動顏色。恨籐輿之不能

飛越也。既至家。夫人方獨坐。低首讀來書。女至。亦無覺。及近夫人座。次。夫人愕然曰。汝歸矣。阿龍書來。甚平安。汝自讀之。可也。書凡二封。一與夫人。女且置不讀。先讀與己之書。書曰。英妹手足。壺自離家。隨林將軍至湖南。沿道初無完村。西兵不紀。焚掠淫殺。在在而有。一望成墟。近者湖南兵敗。諸將相繼歸降清軍。林將軍意亦動。壺一日進謁將軍。論雲貴大勢。將軍太息。決計反正。今尙未得時機。機至卽行。近者清勇略將軍趙良棟。已破成都。奮威將軍王進寶。亦克保寧。我軍大將。王屏藩。陳君極。自殺。吳之茂。被掠。重慶亦陷。吳應麟一軍。已回屯貴陽。壺之書。卽自貴陽發也。聞清廷已命趙良棟屯黔蜀要路。壺覲得機倪。卽進謁趙將軍。以應月師之預言。計壺至軍。已七閱月。

自秋歷春。大小凡十餘戰。皆略有勝著。蒙林將軍補副將矣。此區區者。初不足戀一心。但思拔妹氏於苦海愁城之中。來時桂子方胎。今則垂楊已綠。妹長日何作。有無進謁陳夫人於曇花菴。夫人自大王喪後。皈依之心。當益堅矣。吾恩深義摯之姑母。及盛弟。定平安。壺每夕必誦所贈詞。至十餘徧。始就枕。清曉亦然。畫圖未付裝池。但用厚楮。重裹。盡日隨身。亦不欲展觀。防其褻玩。每風日晴美。始一發視。不知妹氏前生。飲何靈泉。仙液吐屬。乃超越凡近。至此也。上姑母書。另繕軍事得閒。尙有書歸。伏希珍衛。兄壺百拜。女迴環讀。至數徧。始昂頭見夫人。方相向微笑。女羞不可耐。匆匆登閣。作報書矣。

第十三章

時清廷降諭。趣安親王岳樂。順承郡王勒爾錦。貝勒察尼回京。以貝子彰泰。代爲定遠平寇大將軍。拜蔡毓榮爲綏遠將軍。指授方略。由沅州進兵。西軍中張足法敗走。時馬寶已竄瀘州。連陷敘州。林將軍夜召阿龍。議曰。事急矣。彰泰不足慮。然所將皆北來生力軍。不易當。與爾前議者如何。阿龍曰。彰泰驕。而蔡毓榮狡。趙勇略精誠待下。可以往降。時趙軍屯建昌。林興珠遂同阿龍。及壯士二千餘人。渡金沙江。至戟門納款。趙受降。及見阿龍。則叩以兵法及武技。阿龍對答。纍纍如貫珠。趙勇略大喜。命以參將留軍效力。飭林興珠賚疏入朝。陳雲南貴州勦撫機宜。於是尅日進兵。過金沙江。時張足法旣敗。貴陽不守。吳世璠率其所屬。奔雲南。侍郎郭昌同文武官二百人降於清。

軍。遵義、安順、石阡、都勻、思南等府。以次下。世璠益窮蹙。召方光琛、郭壯圖、謀卻敵。方光琛曰。清兵已築盤江浮橋。濟師。勢不易當。且李本深已降北軍。人心搖動。今當遣高起隆、夏國相、王會、王永清、以二萬衆屯平遠西南山。居高臨下。以搏敵軍。更遣線緘、巴養元、鄭旺、李繼業、以精卒萬人。據盤江西陂。扼北軍進取之路。兩路相爲犄角。敵或不能遽進。更發嚴符。取馬寶於蜀中。令以勁兵來援。或可暫抒目前之憂。且城中尙有大象數十。驅之出城。爲象陣。以戰。北軍必未習見。當駭顧奔潰。吾以精卒乘之。其勝必矣。世璠大韙其議。果飛符召馬寶於蜀中。而王會者。梟悍不習兵要。清兵分道進攻。土司安勝祖。以兵助清軍。平遠一軍遂敗。王會降。清廷嚴旨。趣賚塔。以大軍自廣西

趣雲南。奪石門坎。新城所。黃草壩。諸隘。兵鋒將及曲靖。時貝子彰泰。壁滇池。將軍賚塔。壁黃草壩。趙勇略既奪還建昌。渡金沙江。抵滇。入面彰泰。陳三事。其一。先破外護。使賊匹馬不得出。乃可招降。其一。結營遼遠。賊得番息。當移軍偪之。其一。降者宜分別收養。不宜盡發滿洲爲奴。彰泰者。目不知書。以清之宗室督師。當吳軍盛疲之後。以北來勁卒臨敵。西師人無戰心。故所向克捷。驕恣已極。先是建昌之敗。趙勇略上疏。劾吳丹。朱衣客。失機。吳丹。納蘭太傅子也。漢人不能彈劾滿人。彰泰既忌勇略戰功。又惡其排滿。更聞不應以降人爲奴於滿洲。則大怒。用滿洲語相駁詰。勇略不能解。瞠目莫答。幸勇略已先奏聞。廷議悉如勇略陳請。彰泰益忌。計不沈沒其功不止。阿龍在軍。

知旨。從容告勇略不宜與彰泰忤。將來克捷。敘功必爲所抑。勇略忼
爽負氣。乃大言曰。朝廷清明。不能以彰泰一言。遂爾遏抑吾功。阿龍
曰。不然。開國之始。待武臣厚者。以天下未平也。尙耿二王及吳三桂。
皆分茅土。久乃驕恣不可制。至於稱戈內向。朝廷鑑漢人之不足恃。
故是役咸以近支王公統兵。至數年之久。區區湖南尙不能平。將軍
肅清關中。掃蕩巴蜀。移軍來滇。疾如風雨。此深中滿人之忌。彰泰統
袴小兒耳。幸綜兵要。試觀蔡毓榮脅肩諂笑。自居奴隸之列。彰泰日
與親稔。將來必用將軍之力。以取滇。功成則彰泰與蔡毓榮分之。必
舉建昌失機之事。爲將軍罪。願將軍以宏量成大功。勿斤斤與小人
校其得失。將軍歎曰。吾但知報國耳。吳丹之恨我。我亦知之。願男子。

當。自。吐。其。氣。吾。不。能。效。蔡。氏。仙。仙。倪。倪。諂。事。彰。泰。小。子。也。阿。龍。既。退。
心。服。勇。略。之。忠。概。然。深。虞。其。得。禍。是。時。爲。康。熙。二。十。年。十。月。清。兵。已
薄。雲。南。世。璠。自。城。中。出。步。騎。萬。餘。衆。列。象。陣。居。前。清。兵。見。象。頗。慄。懼。
顧。象。能。躡。敵。苟。一。驚。駭。而。反。奔。轉。足。自。困。清。兵。用。紅。衣。大。礮。迎。擊。象
果。反。奔。世。璠。之。陣。大。亂。陣。斬。將。軍。胡。國。柄。劉。玘。及。世。璠。之。總。兵。官。九
人。清。軍。大。進。阿。龍。以。數。十。騎。追。逐。繞。出。密。林。之。後。草。間。有。人。呼。曹。公
子。阿。龍。大。驚。停。騎。問。曰。爾。爲。何。人。對。曰。劉。升。也。劉。升。爲。世。渭。乳。母。之
子。時。至。吳。家。從。劉。玘。出。兵。玘。死。劉。升。足。爲。流。矢。所。中。方。其。出。時。走。別
曹。夫。人。楚。英。乃。作。書。屬。阿。龍。度。阿。龍。必。在。趙。將。軍。營。中。顧。萬。軍。之。中。
何。從。得。阿。龍。然。女。之。深。情。冀。獲。萬。一。之。濟。故。爲。此。不。可。必。得。之。舉。乃

不期兩情固結蒼蒼者亦爲之作合竟無意得劉升而劉升非被創僵臥者亦無從見阿龍也阿龍停騎呼曰劉升吾家如何劉升呻吟胸間出一書紙言曰此女公子所屬也小人萬死藏之胸際今幸得面公子吾責盡矣阿龍顧來騎取馬扶劉升乘之挈之歸營

第十四章

阿龍既以劉升付軍醫裹其創坐定啓書讀之書果爲楚英親筆然函已折角且多汗漬幸箋素尙完好書曰龍哥手足別二年矣彼此消息斷絕雖未知南北勝負所在但聞嗣王已歸五華宮則貴陽之不守決矣連日城中紛擾如亂絲方光琛持議取馬寶於敘州而馬寶之子聞爲仇家所殺今城中將排象陣出抵北軍然餘軍亦不過

二萬餘人而已。妹於北軍未至時。已奉母及弟。入曇花菴。陳夫人日益瘦損。枯坐蒲團。念佛。妹及母弟居後軒。芭蕉蔽天。入秋更陰沈。可悲。大王舊日姬侍數十人。前此曾有至菴中者。恆拜陳夫人爲師云。城下後。人人皆將披緇落髮爲尼。以眼中情狀卜之。外兵當益盛。城中援絕糧盡。嗣王所部。必有心懷反側者。妹至爲嗣王危之。龍哥果事趙將軍。則先登破城者。必爲趙軍。事定後。可先至金馬山救我。或請之趙將軍。以兵擁護此菴。勿爲亂軍所躪。舉家寄身鋒刃。未知此書能否遽達。此事仰恃天心而已。妹楚英和淚啟。阿龍讀時。淚落不已。計破城之期已近。移時即可與楚英相見。時北軍圍雲南城。可十餘匝。趙勇略所將綠營兵。則盡隸彰泰麾下。勇略舍衛隊百餘人外。

初無一軍。阿龍則日夕侍勇略之側。勇略恆稱其忠誠勇敢。爲後來之秀。此時滿漢軍已十萬餘。世璠遣元帥郭壯圖以死士扼得勝橋。彰率滿兵前撲。皆敗。且死者相續。而西兵卒未肯退讓咫尺之地。彰泰乃與蔡毓榮議。此橋非趙良棟不能尅。顧其人很厲。好犯上。成功適長其驕。不如別遣他將。蔡毓榮曰。今且圖攻城。城尅後。敍其勳績與否。則權在貝子。且納蘭太傅甚恨其劾吳丹。卽成功歸朝。亦必得罪矣。彰泰悅。乃召趙勇略入帳。正色曰。趙良棟。汝略有微勞。足錄所惜。驕而犯上。今予爾精卒二千人。迅取得勝橋。橋得。則我軍方能進撲。國有常刑。汝其慎之。勇略怒絕。顧爲名分所格。不得已。奉令出語。阿龍曰。彰泰以小兵與我令奪橋。兵少固無礙。然不能一往直前。今

先伏馬兵於南壩兩岸。分步兵爲三隊。結營立壕牆。牆上架火鎗子母礮。以待敵。當以夜取之。曹壺汝督騎隊。在南壩。聽予號令。阿龍奉令。握長槩。督騎隊。飽食而出。漏二下。勇略騎善馬。持大刀。大呼過橋。郭壯圖亦健勇。奮長槩守橋。勇略怒馬。劈以大刀。壯圖亦能軍。阿龍奮槩出。馳刺壯圖之馬。馬腹中槩。狂跳。幾覆壯圖於地。壯圖尙健。勒兵進撲。壕牆伏兵。三起應之。壯圖力盡。遂大敗。勇略過橋。阿龍奮槩從。追壯圖至三市街。壯圖反其兵。再接。而勇略精神益健。阿龍槩鋒所至。一健將落馬。西兵復大亂。噪奔。滿兵亦大呼。尾其後。破東南兩門。天甫遲明。壯圖趣歸其第。舉火自焚。煙燄燭天。世璠在五華宮。登高而望。城中火十餘起。內侍已星散。有人言。何進忠。林天擎。線緘。黃

明已降。北軍將以軍入犯。世璠歎曰。事去矣。拔劍四顧。乃自刎於五華宮中。天明。彰泰同蔡毓榮、穆占入城。彰泰駐軍方光琛之第。令穆占、蔡毓榮入搜五華宮。三桂寵姬一爲王氏。一爲呂氏。皆有殊色。穆占、蔡毓榮各取其一。相顧大笑。

第十五章

此時阿龍從數騎。力奔金馬山。嚮曇花菴。菴稍僻。幸無游兵。菴門嚴閉。阿龍以馬策撾之。無應者。阿龍卽門外高呼曰。爲告陳夫人。曹壺在此。爲此菴保衛。非他人也。始聞有老嫗就門。再三問。阿龍復大聲就門外述之。移時無聲。似入啟。夫人更一小時。菴門闢矣。阿龍留騎士於門外。鞠躬進門。夫人禪房中。有女人十數。則五華宮人避難至。

此者。阿龍不敢卽入。聞夫人告侍者曰。請曹將軍入面。阿龍遂拜於禪榻。目不敢旁矚。夫人曰。將軍幸成功。然吳氏煨燼矣。語不成聲。阿龍曰。在亂軍得楚妹書。言前數月。舉家已依夫人蓮座之下。且言夫人無恙。壺幸從趙勇略將軍入城。諸將方悉力擄劫子女玉帛。壺心念夫人及姑氏。與楚妹盛弟。故躬造禪房。已留十餘騎於菴外。勿令亂軍進擾。夫人曰。非將軍至此。吾輩亦不得生。座上諸人皆吳王宮中舊人。方城外煙火燭天。匆匆至此。阿龍急不能待。卽曰。壺姑氏安在。夫人曰。卽在後軒。因呼侍者導曹將軍入。內小門一道。曲折轉數迴廊。果見芭蕉蔽天。綠窗隱隱。寂無聲響。侍者引阿龍繞過曲闌。見小軒五楹。紗窗中。楚英背面內嚮。以手扶頭。似泣。阿盛傍坐。獨不見。

夫人阿龍卽大呼曰。姑母。楚妹。阿龍歸矣。卽聞楚英作異聲。呼曰。阿娘。龍哥至矣。夫人噤不能聲。而阿龍已奔入。見夫人方支枕起坐。卽踞於榻。引夫人之手。接之。已頭言曰。夢邪。真邪。夫人曰。龍兒。吾亦疑夢。汝何以至此。阿龍曰。昨日二鼓。從趙將軍奪得勝橋。與郭壯圖大戰。壯圖勇絕。馬腹中兒。槩垂覆。復追奔至三市街。復巷戰。壯圖大敗。自焚。貝子彰泰。合蔡穆二將軍入城。搜五華宮。兒不忍見其慘狀。亦不聽從。騎劫奪。率十餘衆來此。並爲曇花菴保衛。願母勿憂。女曰。郭壯圖死耶。嗣王如何。阿龍曰。何進忠已迎降。此人反覆無恆。必擒嗣王獻之北軍。兄匆匆至此。女曰。傷哉。嗣王苟大王。不圖僭號。則吳氏亦不至於赤族。龍哥當爲我家存阿盛也。阿龍曰。盛弟今當變姓名。

爲曹氏兒。方得瓦全。清廷恨大王甚。非湛吳氏之宗。不可也。女曰。龍哥。饑乎。阿龍曰。饑何待言。然從萬死之中。見吾深恩之姑母及吾至愛之妹氏。雖盛饑亦飽。遑計昨宵至此之未食也。楚英不期微笑。卽起趣廚娘進食。蓋城中受圍至九閱月之久。粒食幾盡。幸陳夫人豫料及此。儲米百斛。以今日計。尙有餘糧。飯熟。佐以鹽豉。阿龍且食。且視楚英容華。至此幾絕代矣。食至數盃。尙不知飽。楚英微笑曰。龍哥。乃健飯。至是阿龍驚曰。吾不幾連進七盃耶。阿盛大笑。夫人及女咸爲胡盧。阿龍始寘箸曰。武夫可笑。阿龍旣盥漱。坐定。問夫人曰。姑母至此時。城中如何。夫人曰。嗣王一歸。吾已知外事之不足收拾。方光琛無謀。郭壯圖恃勇。吾宗能戰者。但有世琮一人。聞亦戰死。餘人二。

三。其。德。不。足。深。恃。勢。盛。則。爲。攀。鱗。附。翼。之。思。勢。敗。則。爲。賣。主。求。榮。之。事。清。廷。誅。叛。極。嚴。彼。馬。寶。諸。人。必。降。降。亦。無。幸。嗣。王。果。能。自。裁。尙。可。逃。寸。磔。之。苦。阿。龍。試。爲。我。探。之。阿。龍。曰。趙。將。軍。入。城。兒。尙。未。面。今。留。數。騎。守。菴。外。兒。當。往。而。勇。略。後。明。日。再。來。女。曰。龍。哥。幸。至。吾。故。宅。得。不。爲。亂。兵。焚。燬。否。阿。龍。曰。入。城。時。已。遣。劉。升。將。數。騎。赴。故。宅。守。護。當。不。爲。亂。兵。所。躪。妹。勿。憂。也。遂。出。謝。陳。夫。人。夫。人。曰。將。軍。言。留。數。騎。在。此。當。否。犒。以。銀。物。阿。龍。曰。予。之。食。足。矣。

第十六章

自趙勇略渡金沙江至軍。八日。而雲南平。諸將入城。人人囊橐皆充物。或擄取美女爲妾。自穆占蔡毓榮二帥以下。皆然。獨趙勇略一絲。

不染亦不縱其所部入城。阿龍於城破後向勇略陳情。視其姑母。勇略許可。故阿龍得以數騎至金馬山。至是覓得勇略行館。入謁。勇略曰。余見爾挺槊刺郭壯圖馬腹。幾覆而起。此賊幾爲汝所得。居然幸逃。所藝殊不弱。阿龍曰。世璠見縛否。勇略曰。彼自裁矣。爾亦聞穆占。蔡毓榮各奪得吳三桂一姬耶。阿龍驚曰。大帥奈何如是。勇略曰。此所以成爲大帥也。吾聞彰泰敍功不及我。力獎蔡毓榮穆占之勇。於吾昨日勳績。但於無意中略敍數言。此功必不錄。且吳丹已有書告其父明珠。復論建昌之事。教朱衣客訟吾。予兵少。故及於敗。予幾罹於禍。今前之功。必爲建昌所掩。予今將移屯曲靖。以待朝命。果黑白爲納蘭倒置者。予必訟之。汝不幸而從我。卽有大功。亦無從達之。帝

聽阿龍曰。壺但得會其家人。於願已足。功名顯晦。自歸時命。不足深較。且壺有故宅在圓通街。將往省親。勇略曰。城中紛擾。爲滿兵擄掠。幾無完家。爾宅尙無恙邪。阿龍曰。當入時。已令舊僕將數騎往守門。園。或且不爲亂兵蹂躪。勇略曰。可。余卽以明日移兵駐曲靖。已列爾勳績。上之蔡將軍。至於如何。則視爾時命耳。阿龍遂辭勇略上馬。至故宅。宅外有數騎扼守。宅中景物。一一如故。桂花已開。幽香繞廊。阿龍巡視一週。卽命劉升以二十金犒諸騎。時已薄暮。遂宿舊時軒中。遲明。聞人言。方光琛及其子學潛。從子學範。皆磔諸軍門。戮世璠之屍。函首馳獻闕下。又聞馬寶爲希福所擊。逃姚安。赴希福軍前降。人言馬寶此降。非出本心。亦將伏刑。此時城中粗定。掠劫之事亦止。彰

泰出示慰撫滇民而已。趙良棟攻城陷陣之功。軍府竟一字不錄。阿龍大笑曰。趙勇略尙爾。況乃我耶。於是謀迎夫人及楚英妹弟歸宅。幸康熙帝但誅從亂諸人。於吳宗未嘗殲滅。阿盛則冒曹姓與阿龍爲從兄弟。楚英同夫人既至故宅。處處如溫前夢。部署既定。阿龍忽曰。前姑丈從軍。曾言有遺囑。封之匣中。今安在者。夫人云。此物未去。吾身卽含淚啟篋。出一小金匣。封鏽甚固。既發。出一紙片。草書云。吾此行必死。所戀者愛女耳。阿龍忠懇。可以楚英嫁之。桂花之下。有先人藏黃金一千兩。發之可以自贍。阿盛年幼。託阿龍筦之。子東遺囑。阿龍讀時。大哭。母女亦悲不自勝。阿龍曰。藏金歸之盛弟。壺萬不與。唯姑丈死後。有言。姑母前時見允。壺只今遵命成禮矣。女疾起。避去。

阿龍僞爲無見。遂以是月六日成禮。城中大亂之後。吳宗多遠避。旁邑賀客無幾。旣入洞房。阿龍曰。妹舊居是間。壺足迹不敢一至。不圖今日爲我二人雙棲。雙宿之地。女曰。當日非粉兒代我。則爲賊所劫。此恥雖罄金沙江之水。亦萬萬不能洗滌。此污阿龍曰。賊焉敢爾。敢問壺行後。妹氏何作。且所寓書。何知其必達。女曰。劉升來告行。吾正在無聊中。亦不聞知城外消息。但以君平日志嚮卜之所謀。必遂。不遂。決不之謀。又聞礮聲隆隆。吾決趙軍必到。到時君必隸其麾下。冀劉升或能與君相見。此亦黃耳傳書。飛鴻繫帛之意。不圖此書竟落君手。此中正有天意使然。爾我膜拜禮天。無他語也。阿龍歎曰。趙勇略蓋世。英雄可惜。爲權奸所忌。今移兵曲靖。不知彰泰作何陳奏。而

納蘭居中作何譎言。以欺朝廷。趙勇略不屈。將來必有叩闥之舉。楚英曰。然則君功亦不錄矣。阿龍曰。此何待言。幸吾與蔡帥無仇。見時頗垂青眼。不然。以姑丈之故。斥爲叛黨。禍事正未可言。女曰。吾父高情遠識。胡能言叛。願身爲吳王從孫。勢在不得不爾。豈宿心如是耶。忽聞粉兒在窗外。將夫人之命曰。夜深矣。明日二人起朝。夫人曰。吾家叨陳夫人之賜不少。爾夫婦當往謝之。於是楚英盛服。阿龍則用清朝副將冠。翎頂輝然。同至曇花菴。入門已聞木魚聲。似有數人同誦蓮花經者。問之侍者。夫人今日何事禮佛。侍者竊言曰。近者朝廷有旨。析大王骸骨。傳示十八行省。令藏之庫中。夫人聞而大悲。故令舊時宮人在此禮佛。爲吳王追薦。二人遂停於外廂。不敢入。移

時梵唄聲止。侍者入言。夫人令入。夫婦遂膜拜於禪榻之下。夫人起避曰。老衲焉敢當貴人禮拜也。遂延坐。進茗。夫人二目盡腫似悼。吳王分尸之慘。夫婦亦不敢問。夫人曰。曹夫人安否。阿龍楚英敬對曰。叨夫人福庇。幸聰健如昔。夫人曰。夫人有福。得此快婿。若老衲者。少歷風波。老來復經浩劫。涅槃之期既近。西歸卽在旦夕之間。後來骨塔所藏。願君夫婦每年於浴佛之日來此一行。足矣。言已掩面而泣。夫婦無言。少須辭歸。曹夫人聞吳王析骸之信。亦歎曰。王生前固負朝廷。然朽骨無辜。卽碎搗亦不之覺。分析又胡爲者。時阿盛年十七。雖在難中。均曹夫人自課。楚英亦日爲匡誘。漸漸通文。一日忽得廷旨。據蔡毓榮奏稱。副將曹壺單騎過橋。力刺郭壯圖之馬。幾就擒。而

逸。於是隨大兵入城。誠勇可嘉。卽補江寧副將。加果勇巴圖魯。行
赴新任。毋庸來京。陛見。欽此。於是阿龍挈家赴江寧。未行之前一日。
將往辭陳夫人。而陳夫人圓寂矣。

民國七年一月印刷
民國七年一月發行

(劫外曇花)全一冊

定價銀二角五分



著者

閩縣林紓

發行者

中華書局

印刷者

中華書局

上海靜安寺路一九二號

印刷所

中華書局

總發行所 上海福州路轉角

中華書局

分發行所

中華書局

北京天津奉天廣州長沙開封溫州長春
漢口南昌南京杭州濟南保定武昌太原
常德福州成都重慶雲南徐州西安汕頭
香港廣州衡州貴陽吉林潮州安慶桂林
東昌廈門蘭州烟台綏化煙台鄭州梧州
石家莊黑龍江張家口哈爾濱新加坡

(一七八一)

